



AKHBAR	:	SINAR HARIAN		
TARIKH	:	13/12/2019	MUKA SURAT	: 30
JABATAN	:	JPSM		
KLASIFIKASI	:	PERHATIAN		

11 pembalok haram ditahan

FOTO: JPNP



Jentera yang digunakan dalam aktiviti pembalakan haram di Hutan Simpan Remen Chereh Tambahan Sungai Lembing disita Ahad lalu.

JPNP sita balak dan jentera bernilai RM1.6 juta

NIK AMIRUL MU'MIN
NIK MIN

KUANTAN

Jabatan Perhutanan Negeri Pahang (JPNP) menahan 11 individu disyaki menjalankan aktiviti pembalakan secara haram di Hutan Simpan Remen Chereh Tambahan di Sungai Lembing di sini Ahad lalu.

Semua lelaki berusia 33 hingga 66 tahun itu ditahan kira-kira jam 11 malam ketika berada di rumah kongsi yang terletak dalam kawasan hutan simpan tersebut.

Ketua Penolong Pengarah (Penguat kuasa) JPNP, Nor Azirim Ahmad berkata, susulan operasi itu, pihaknya menyita kayu balak jenis kempas, meranti dan kelat bernilai lebih RM100,000.

Menurutnya, turut disita beberapa jentera termasuk dua pacuan empat roda, tiga lori, lima jengkaut



Antara balak yang disita hasil aktiviti pembalakan haram di Hutan Simpan Remen Chereh Tambahan di Sungai Lembing Ahad lalu.

dan tujuh jentolak bernilai lebih RM1.5 juta yang berada dalam kawasan hutan simpan terbabit.

"JPNP juga merampas lima mesin memotong kayu dan menyita rumah kongsi termasuk pelbagai peralatan lain.

"Siasatan awal mendapati semua pekerja itu berada dalam kawasan hutan terbabit sejak pertengahan bulan lalu," katanya dalam satu kenyataan di sini semalam.

Nor Azirim berkata, seorang individu dipercayai dalang utama aktiviti pembalakan haram terbabit mendakwa mereka sudah memohon lesen pembalakan di kawasan itu namun belum mendapat sebarang

kelulusan.

"Pihak kami sedang menyiasat terhadap dakwaan individu terbabit yang mendakwa sudah membuat permohonan lesen pembalakan beberapa bulan lalu.

"Walaupun jika benar ada membuat permohonan, mereka tidak boleh melakukan sebarang aktiviti pembalakan dan berada dalam kawasan hutan simpan terbabit sebelum kelulusan lesen dikeluarkan," katanya.

Beliau berkata, berdasarkan jumlah jentera digunakan, pihaknya tidak menolak kegiatan itu cukup terancang dan mereka berani menjalankan kerja-kerja pembalakan walaupun tanpa lesen.